



*Dauid estant venu à bout de ses affaires , fait nombrer son peuple , dont Dieu le punit d'une peste qui extermina son peuple.*

**A** famine fut és iours de Dauid par trois ans continuels, tant pour le peché de Saül que de ses gens, qui auoient contre la foy promise, mis à mort les Gabaonites, dont Dauid leur voulut satisfaire, mais ils ne voulurent autre chose que les enfans de Saül, qui enfin leur furent baillez, reserué seulement Miphiboseth fils de Ionathas, & ils les crucifierent tous. Et depuis, Dauid eut quatre memorables victoires contre les Philistins, dont il rendit graces à Dieu, par vn tres-excellent Cantique. Or apres ces choses, Dauid fist nombrer son peuple par Ioab, qui trouua huit cens mille hommes forts à porter épée, & cinq cens mille de la lignée de Iuda, dont le Seigneur fut courroucé contre Dauid, qui en reconnoissant son offence, dist, l'ay peché deuant le Seigneur, lequel par le Prophete Gad, dist à Dauid, Choisis pour ton offence d'auoir sept ans famine, ou trois mois de fuite par tes ennemis, ou trois iours de pestilence. Mais Dauid éleut la pestilence, disant ; Il vaut mieux tomber és mains de Dieu, que des hommes. L'Ange doncques frappa le peuple de pestilence, & en mourut soixante & dix mille hommes, depuis Dan iusques à Bersabée.